



**PARLIMEN MALAYSIA  
(KAMAR KHAS)**

**UCAPAN DI BAWAH USUL BERKENAAN  
PERKARA  
TADBIR KERAJAAN  
(*PERATURAN MESYUARAT 17 BAHARU*)**

**DEWAN RAKYAT  
MESYUARAT KEDUA  
PENGKAL KEEMPAT  
PARLIMEN KETIGA BELAS**

**KEMENTERIAN SUMBER ASLI  
DAN ALAM SEKITAR  
14 NOVEMBER 2016 (ISNIN)**

**USUL DARIPADA YB KLUANG**

**2.30 PETANG HINGGA 4.30 PETANG**

## **DEWAN RAKYAT MALAYSIA**

### **KAMAR KHAS 17(1)**

**TAJUK UCAPAN** : KILANG SAWIT DI JEMENTAH/KEBUN  
BAHRU DAN KILANG GETAH DI BULOH  
KASAP

**UCAPAN** : YB TUAN LIEW CHIN TONG  
[KLUANG]

**TARIKH UCAPAN** : 14 NOVEMBER 2016

**KEMENTERIAN** : KEMENTERIAN SUMBER ASLI DAN  
ALAM SEKITAR

**UCAPAN** :

Operasi kilang memproses sawit milik Tetuan Milik Mestika Sdn Bhd yang terletak di Jementah/Kebun Bahru telah menyebabkan pencemaran udara yang membawa kepada permasalahan bau busuk dan turut memberi kesan kepada kesihatan penduduk setempat.

Kilang tersebut mula dibina pada 2014 dan sejak itu, banyak rungutan serta aduan telah dibuat oleh penduduk yang risau akan berlakunya pencemaran udara yang bakal menggugat kesihatan mereka. Lokasi kilang yang dibina adalah sangat berhampiran dengan tempat tinggal penduduk.

Menurut ADUN Jementah - Tan Chen Choon, kilang tersebut telah dibina tanpa kelulusan Pihak Berkuasa Tempatan iaitu Majlis Daerah Tangkak (MDT) dan Jabatan Alam Sekitar Johor. Bahkan MDT telah membawa pemilik kilang ke Mahkamah Sesyen pada bulan Mac 2015 atas kesalahan membina bangunan kilang tanpa kebenaran mengikut Akta jalan raya, perparitan dan binaan 1974.

Walau bagaimanapun, pemilik kilang telah membuat rayuan di Kementerian Alam Sekitar di Putrajaya.

Berpandukan jawapan balas pada sesi dialog yang pernah dijalankan antara penduduk dan pihak kilang pada 21/8/16, pegawai dari Jabatan Alam Sekitar Muar telah menyatakan bahawa Kementerian Sumber Asli dan Alam Sekitar telah meluluskan rayuan oleh pihak kilang namun tertakluk pada terma-terma dan syarat-syarat tertentu yang ditetapkan. Adakah benar bahawa Kementerian Sumber Asli dan Alam Sekitar memberikan kebenaran kepada Kilang tersebut? Atas alasan apa kebenaran diberikan? Dan adakah Kementerian sedar bahawa ancaman terhadap penduduk tempatan?

Juga, kilang getah di Buloh Kasap, yang juga di Kawasan Parlimen Segamat, menyebabkan pencemaran udara yang membawa kepada permasalahan bau busuk dan turut memberi kesan kepada kesihatan penduduk setempat. Telah beberapa kali isu ini dibahas dalam parlimen oleh saya, tetapi belum ada sebarang tindakan dari pihak Kementerian Sumber Asli dan Alam Sekitar.

## **JAWAPAN:**

Tuan Yang Dipertua,

### **[ Kilang Kelapa Sawit Milik Mestika Sdn. Bhd. ]**

Bagi Kilang Kelapa Sawit Milik Mestika Sdn.Bhd, rayuan permohonan Penilaian Awal Tapak (PAT) telah dikemukakan oleh pihak premis ke Ibu Pejabat Jabatan Alam Sekitar melalui surat ruj. MM/SK/15(007) bertarikh 21 Januari 2015.

Jabatan Alam Sekitar di bawah Kementerian Sumber Asli dan Alam Sekitar telah mengeluarkan surat tiada halangan terhadap tapak cadangan melalui surat rujukan AS(PN)91/110/621/001 Jilid 24( ) bertarikh 27 Mac 2015, dan surat kepada Pejabat Menteri, Kementerian Sumber Asli dan Alam Sekitar rujukan AS(PN)91/110/621/001 Jilid 24( ) bertarikh 27 Mac 2015.

Alasan kebenaran diberikan oleh JAS adalah berasaskan kepada keperluan jarak penampakan sekurang-kurangnya 500 meter seperti yang ditetapkan di dalam *Guidelines for Siting and Zoning of Industries* dan keberkesanan teknologi kawalan pencemaran. Dalam hubungan ini cadangan kilang kelapa sawit tersebut didapati memenuhi keperluan teknikal jabatan ini.

Walau bagaimanapun, bagi mengawal isu pencemaran daripada premis yang boleh memberi ancaman terhadap penduduk tempatan, langkah-langkah kawalan yang ketat telah disyaratkan bagi Kelulusan Bertulis (KB) di bawah Seksyen 19 dan lesen di bawah Seksyen 18, Akta Kualiti

Alam Sekeliling 1974 yang telah dikeluarkan melalui surat rujukan ASJ(B)31/152/000/104 Jilid 4.(sk08) bertarikh 28 Julai 2016 ke atas cadangan projek tersebut. Antara langkah-langkah kawalan pencemaran yang disyaratkan kepada premis adalah:

- i) Pemasangan *biogas plant (clean development mechanism)* bagi mengawal pencemaran bau dengan memerangkap gas-gas rumah hijau yang terbebas daripada kolam-kolam sistem rawatan efluen perindustrian (IETS) dan seterusnya untuk penjanaan kuasa elektrik;
- ii) Pemasangan *polishing bio membrane plant* sebagai rawatan akhir effluen sebelum pelepasan ke alur air bagi mematuhi standard pelepasan 20mg/L bagi parameter BOD<sub>3</sub>;
- iii) Effluen terolah hendaklah dilepaskan ke alur air ke Sungai Legeh (hilir Sungai Jementah) iaitu tidak melibatkan takat pengambilan air Loji Rawatan Air, Jementah; dan
- iv) Pemasangan sistem kawalan pencemaran udara bagi mematuhi pematuhan standard pelepasan *Particulate Matter (PM)* 150mg/Nm<sup>3</sup> yang dilengkapi dengan *Continuous Emission Monitoring Systems (CEMS)* bagi membolehkan pemantauan pelepasan asap hitam dilakukan oleh JAS secara *online/berterusan*.

Berhubung dengan pengoperasian premis ini, pihak JAS telah menjalankan lawatan penguatkuasaan pada 9 Ogos 2016 setelah premis mula beroperasi. Premis didapati patuh serta masih tiada pelepasan

effluen. Bagi memastikan sistem kawalan pencemaran beroperasi dengan berkesan dan cekap, premis juga akan melaksanakan *Guided Self-Regulations* (GSR) dengan salah satu elemen iaitu *performance monitoring* sistem alat kawalan tersebut oleh orang berwibawa (*competent person*) yang ditauliahkan oleh Jabatan Alam Sekitar.

Pihak JAS akan menjalankan pemantauan dan penguatkuasaan dari semasa ke semasa supaya pihak premis mematuhi semua syarat-syarat Jadual Pematuhan (JP) yang dikepilkan bersama Lesen yang telah dikeluarkan untuk mengelakkan sebarang aduan pencemaran oleh pengoperasian kilang.

**[ Kilang Getah Kian Lee SMR Factory Sdn. Bhd. ]**

Premis Kian Lee SMR Factory Sdn. Bhd. yang beralamat di Lot 952, Buloh Kasap, Segamat pula merupakan kilang getah yang dilesenkan oleh Jabatan Alam Sekitar. Premis ini dipantau rapi kerana aduan berulang yang kerap diterima berkaitan pencemaran bau busuk berikutan lokasinya yang dikelilingi penempatan dengan jarak rumah terdekat adalah 70 meter.

Pihak JAS telah mengambil tindakan penguatkuasaan sewajarnya di bawah peruntukan Akta Kualiti Alam Sekeliling 1974 dan telah mengarahkan premis supaya memasang Sistem Kawalan Pencemaran Udara (SKPU) tambahan serta memastikan bahawa kawasan penstoran adalah tertutup bagi mengawal masalah bau busuk.

Lawatan penguatkuasaan terkini oleh pihak JAS pada 9 Mei 2016 mendapati premis adalah patuh dan tiada aduan direkodkan diterima sejak 9 Mei 2016. Pihak JAS akan meneruskan pemantauan terhadap premis ini bagi memastikan pematuhan berterusan terhadap Akta Kualiti Alam Sekeliling 1974.

Sekian, terima kasih.